

四庫全書

集部

欽定四庫全書

儼山集卷六十四

明陸深撰

墓誌銘三

太學生談君墓誌銘

嗚呼此予友談君舜年之墓舜年諱壽與其伯兄田字舜于自相師友以文學鳴郡中有崑山片玉之風故人謂舜于為東石而君為西石云正德辛巳有以舜年名

上御史者既已得出察院歎曰齋吾志吾逝矣乃卒予在京師傳其事者不一予未敢遽信也東歸問于其兄弟子姪則皆泣不忍言又問于其親識交舊或言不欲盡言予意甚哀之嗚呼士大夫僅立門戶思為燕貽將使後之人弱者獲以自存其賢且明者復資以用世故孟子論故國必曰喬木世臣彼伐其枝葉以傷其本根使濯濯焉抑何利於人國斯豈其心哉無亦所遭逢者有命也嗚呼才美如舜年使蚤取科第以起必不死不

必取科第得為寒素士或不死且不為寒素士稍自晦  
其才亦未至於死今死矣豈非命哉其孤伯古卜以正  
德辛巳十二月二十四日壬寅葬于鶴坡西原祖塋之  
右持東石君所為狀謁銘予義不容辭按談氏今松郡  
大族其先開封人宋博士宗遂扈從南渡居茗雪之間  
再遷上海之鶴坡里工部右侍郎野翁先生舉天順間  
進士歷官九卿有經濟才君之世父也曾祖晚香公祖  
怡靜公俱贈通議大夫工部右侍郎曾祖妣祖妣俱王

贈淑人考諱秩號存省義授郎官妣朱氏君生有異質寡言笑入小學時猶未茹葷年十三喪母即議廬墓曰此家伯喪大母時事吾家學也適野翁罷工部歸聞之曰兒真欲學而伯耶君對曰孤兒非伯尚誰學哉則又泣曰願伯父子視兒也野翁舉少時讀書鐙與之顧謂存省公喜曰弟有子矣時慈谿姚東泉先生有重名野翁禮致之俾君卒業東泉亟加稱賞已補為弟子員有聲遭存省公喪哀毀如禮服闋舉于鄉再三不利然名

益起學益充諸提學使者更三四輩器獎益重竟以例  
上國子國子祭酒踵接皆愛之與東石君自國子再舉  
再不利更相謂曰司空之業衰矣不當再圖乎幸無忘  
授鐙之事年才四十有八而禍作矣寔三月一日也配  
唐氏有淑德視庶子女如已出用不乏嗣躬行勤儉用  
豐其家方西石君護其姪不當為賦長有事于官時唐  
方病又私憂之一哭而卒云享年五十寔二月四日也  
再泆旬間而夫婦相繼逝於仁愛天道竟何如哉子男

一即伯古孝敬而文息女一張志其壻也孫男一如金  
孫女一德貞君器宇修偉昂藏如野鶴而談吐條鬯有  
古策士之風為文章辯博不群詩歌清麗筆札在晉唐  
之間家居尤事力田務本所與游盡海內名士而君之  
兄弟辱謂予為益友予竟何益哉雪涕為之銘銘曰  
孰豐其材而嗇其為器何成之難而毀則易嗚呼其藏  
之深以俟知已於百世

勅封安人郭氏墓誌銘

嗚呼禮婦人無稱其稱賢婦繫其夫其稱賢母繫其子  
匪專詞也此深讀郁侍御希正所狀郭安人事而有感  
焉安人今同知松江府事新蔡張侯配也深與希正為  
諸生時侯已來蒞於松松之人宜侯甚也由倅以登故  
無改地焉考於侯安人之賢概可知已按郭氏出汝寧  
世武弁有諱某者以文資通判武昌府安人之父也母  
曾氏初武昌君與侯家公友也器侯而女焉安人自幼  
即不凡習於女紅手不停製曾夫人見其勞於寒暑而



止之每前對曰舍此閨中安事也嘗授孝經列女傳請於母師而讀之曰由此列女貞婦知古昔有若人也及笄歸侯侯時為庠生富有文名日多賓友安人從中饋給之無倦夜分讀書每以織紵助其佔畢侯博學多才嘗試為繪事夫人從旁睨之曰為此能無妨於學乎抑將奪而功也侯憮然止之自是一意於學領河南某年鄉薦遂入胄監安人奉二大人於家居起以時滫髓必具使二大人忘其子之遠於身也侯宦松迎二大人來

養安人日率子姓娛弄左右使二大人忘其身之去鄉  
土也侯顧內得助故不以家累政嘗受牒賑郡饑侯以  
里計民以民計粟大發一時全活者甚衆事竣閱燭會  
稽官廩幾空頗私憂焉安人心知之曰是不過得罪焉  
耳為郡父母而活民寧能計利害耶侯聞而釋然海寇  
發於崇明大出軍撲滅之檄侯為先鋒戒行屬安人以  
家事安人大聲曰此王事也吾將家女軍旅之道以無  
懼為主況此小醜盜兵者乎上慰舅姑下訓子女妾之

分也侯果以大捷蒙厚賞若安人者亦可壯也侯督餉  
歲一至京師安人嘗嚴治門戶以徯其教子也尤嚴而  
有法及是侯適出役而安人歿於粉署嗚呼若是者能  
無稱乎是故次其大者繫之侯以著安人之賢也享年  
五十有二以某年月日受封以天順某年月日生以正  
德某年月日卒子男三長萱娶游氏次葵娶曹氏俱學  
生次芷聘王氏息女二長適曹大夏次適孟堂早卒孫  
女一侯南還將歸櫬於新蔡卜以某年月日葬焉乞銘

銘曰

惟婦之良為家之光厥功孰多中贊潛襄中州淑靈豈  
獨君子英英閨彥懦夫可起周詩采蘋秦風板屋太師  
是陳俾也可錄鳳吉終叶鸞章自天詎曰草露永賁重  
泉

副千戶唐公墓誌銘

嘉靖二年春三月庚申武略將軍副千戶唐公卜葬於  
周涇之原配以喬宜人大封焉禮也其嗣子太學生牧

具衰經奉太常寺少卿曲江趙公狀乞銘深不敢辭按  
唐氏著上海上海之唐寔出子方晉陽靈石人也吳元  
年有諱英者官烏泥涇稅課局大使因家焉英生福福  
生俊俊生昭皆有隱操昭生瑜舉進士歷官至都察院  
右副都御史為憲廟時名臣公都憲公之仲子也母尹  
氏諱鏞字士和別號煮雪人故稱為煮雪先生幼有至  
性孝友和厚儀觀雄偉瞻視左右炯然射人音吐洪鬯  
纚纚然不為婢阿湏澁之態接人未嘗有惰容見者咸

敬公公敬人亦終身也有長才見於家政事輒就理故  
家世遂為邑中冠都憲公遊宦無內顧焉暨還政歸則  
室堂精好園田清嘉歌舞都雅賓客之過從甘脆之盈  
潔公悉心焉都憲公顧而樂之待伯兄桂巖先生尤有  
禮意故邑中稱公為孝子弟弟云弘治壬子山東饑公  
輸粟若干賑之例授松江守禦千戶所副千戶月有俸  
給公具辭章服則拜焉曰聖恩厚矣正德己巳邑大水  
公乃蠲租若干計口給食以活佃丁又若干郡邑長吏

聞公名欲致一見之公不可或有禮其廬者人勸之曰  
當見於是公又不可歲時又招為鄉飲賓公竟不可曰  
吾欲何求也顧不任為禮耳雅愛山水晚益為林泉之  
樂澆花蒔竹架石鑿池日與親知數輩徜徉其間飲酒  
賦詩意豁如也享年七十有二以正德戊寅十一月三  
日終于正寢云配宜人喬氏贈翰林院編脩公之女有  
賢行初連舉女得子輒歿已乃生牧牧生九齡而宜人  
卒公特鍾愛乃擇令族得長樂令平野凌公之女配焉

今侗儻有器局蓋方向顯榮云女四周鳳薛鳳張鷟沈  
陟其壻也深與公家有姪少從桂巖煮雪公兄弟間游  
處若崑山雙壁與桂林連枝交映相輝應接不暇也退  
而察公所存咸近於厚諸女嫠居撫諸甥教養備至故  
周氏甥既登科猶以公姓姓之示不敢忘也則公之種  
德纍行概可見矣宜銘銘曰

深山靈谷厥產鳳麟世德名家乃鍾偉人吁嗟先生稟  
遇特異身際五朝家承六世既令厥名復全而歸文事



武備完德庶幾周涇之匯實維同穴太史銘之萬古是  
閱

方溪劉公墓誌銘

嗚呼必有世德乃有世望必有世澤乃有世家夫世  
有德焉生長見聞必有超於風習之外使人望焉知為  
名流夫是之謂澤漸濡所暨濃潤固殊其於鄉邑郡國  
寔繫觀聽有感化焉此世家之所以重也予於誌敬之  
劉方溪之墓蓋致三嘆於斯劉故上海世家也敬之早

承父兄之澤其生長見聞淵源夙矣加以通敏倜儻之才發其深遠豐碩之積淹雅蘊藉望之於琴尊圖史之間非復尋常品流可企也惜乎天不假年而轉移之具於鄉國多所未試焉嗚呼其孤啓元等卜以嘉靖乙酉十二月六日庚申奉窆於祖塋之次以談進士承儒狀來乞銘陸與劉世嫻也昨歲汀州之葵予為書其玄堂之石茲安敢辭按狀公諱交字敬之別號方溪劉之先自南宋有亨叔者遷居華亭再遷上海者仲禮也曾祖

諱文忠祖諱鈍字廷魯號水月以仲子璵貴贈奉政大  
夫真定府同知祖妣顧氏贈宜人父諱玉字鍾秀號靜  
齋母王氏生三子敬之其季也少穎異在群兒中目光  
如炬治舉子業即通大義善筆札長壻曹怡松家怡松  
諱玘字以淵縣之舊族以行誼聞又善鑒識一見敬之  
撫其額曰是郎終不碌碌吾未舉子吾有女宜配半吾  
子也既入怡松家即為曹氏持家政甚辦會靜齋府君  
邁疾乃辭歸率其婦日侍湯藥復奉王孺人以色養存

歿咸厚以比于禮時從父坦齋府君致建寧政還敬之  
日侍尊俎殷勤歎至逮仲兄宜亭公以汀州還復事之  
如坦齋焉人每羨之湖廣歲饑輸粟若干斛授魯府引  
禮舍人待次于家郡縣有公務冗劇者咸就敬之取辦  
焉乾清大工興部使者分司蘇州專督陶甓檄往從事  
劑料有法大為寧海張公所器縣侯弘農王公莆田鄭  
公咸加賞識敬之不問久暫勞勩未嘗伐焉友人趙雲  
谷既卒其遺孤龍無所於歸為收養之併恤其家如不

及人尤賢之居嘗多蓄名酒暇則致客客至則賦詩屬對相與勘契法書名畫摩挲古彝器為樂與人交不為蹊徑有非禮相犯者輒形之顏面人亦亮之治家井井凡婚嫁喪葬之禮咸適于中教諸子以繼述為大蓋世家之望云以嘉靖甲申八月十三日終于正寢上距成化庚寅六月一日享年五十有五娶曹氏即怡松長女有賢行能相其家子男五長啓元娶余氏次紹元娶沈氏俱國子生次守元娶沈氏縣醫學訓科次慶元娶莊

氏次鶴年女一適縣學生孫繼科孫男二繼孫承孫女  
二敬之視余少長幼嘗往來予家與之游處甚狎也予  
知其才之足以善俗而惜其年之未足以酬志也乃為  
之論次其家世而復系之銘銘曰

千年在前承者劉氏千年在後劉氏伊始人孰不壽逝  
以名紀亦孰匪才崇善則美嗟嗟方溪人遠室邇斯丈  
足徵九原莫起粵有遺休厥在肖似

致仕新淦縣丞榮隱余公墓誌銘

上海有舊家必曰余氏余氏之彥必曰榮隱公公諱麟  
字文禎以縣學生起家仕為新淦縣丞年未五十即自  
銓曹乞致仕是時鈞陽馬端肅公為冢宰特為例處之  
既歸修葺故居手理泉石花竹於城市中極為幽勝庭  
下紐檜相傳為宋元時物人稱之曰喬木云公修髯峻  
宇徜徉其間雅歌投壺飲酒賦詩不復以人間事注意  
澹如也年七十有一而卒其孤繼芳等以墓石請按余  
氏之先有諱承仕者仕宋為拱衛司兵馬護駕南渡因

居華亭之華村十傳至耕樂公之高祖也耕樂字穀寶  
穀寶永樂中應召為太醫賜緋直翰林而終耕樂生旭  
字景陽壻於上海鎮之胡氏遂家焉旭生郇字孟祈號  
梅竹以詩書行誼聞邑中郇生廉字清臣通敏倜儻累  
科不第以例貢入太學授新昌丞配姚孺人寔生公公  
遭愍凶力守先業專意科舉有聲既乃奉例補國子生  
循次授新淦丞新淦故號難治適尹去公遂署篆以清  
慎自勵種種悉辦上官才之他郡縣事有不能辦者輒



檄公公受檄即辦如新淦三載矣旌獎屢至亟為按察使張公某知府吳公叙所器後新淦人去思之饋遺候問歲時不絕吳公謝還亦至上海與公握手相歡者決月乃去人以為難云以嘉靖甲申十二月三日卒以又明年丙戌十二月某日葬祖塋之次娶錢氏御史孫女柔順貞淑允執婦道先公三十七年卒生子一曰繼芳娶俞氏縣陰陽訓術女二適曹恢適奚邦寶繼娶彭氏府尹次女也賢明慈慧以賢母聞生子一曰繼瑞娶韓

氏縣學生女二適劉啓元適曹應文孫男三重器大器  
宗器孫女三深少即知敬公嘗過其家坐春堂俯山亭  
周旋陟降覽觀故舊之跡焚香啜茶每至盡日舉手揮  
麈談古今治亂之迹纒纒可聽與人交啓齒即露肺肝  
不少狗俗態晚年耳目聰明步趨有章燈下猶能作蠅  
頭細字迨屬續猶以繼述屬其子云蓋公天資豈弟樂  
善慕義無彫飾藻繪之行抑其流風餘韻固有以厚之  
也宜銘銘曰

厥家之舊而德之新雖宦途之嗇民以有親進退何累  
蓋云任真風以引之尚有後人是曰榮隱之藏信此貞  
珉

勅封孺人居氏墓誌銘

許孺人姓居氏封兵科給事中許公之繼室也公名滋  
初娶于俞生子相卿是為今兵科給事中公孺人所由  
貴也給事甫孩而俞孺人見背公抱之泣曰兒胡不幸  
幸有母母之其誰則宜時俞居甥舅兄弟也於是俞之

長者以孺人聞公亦聞孺人之賢也遂歸許許一樗翁  
之喪室有季女公以屬之孺人曰此吾同產也先人之  
志也敢不惟厚孺人欣然以之曰抑敢不惟厚既筭悉  
推已匱具嫁之樗翁之妾蔡遺而無子孺人事之恭以  
老焉許故族大而衍內外長幼歲時交際孺人品酌而  
密應之一一當其心家食凡數百指時其寒饑加之惠  
甚辦也凡祭祀賓客必親潔豐腆合禮曰中饋吾職也  
又敢不虔生一子曰桐卿孺人督桐卿以兄之業既乃

循例使待次益王府典膳官曰若且倦矣以儉勤助若家可乎由是許益大初給事幼善病孺人醫禱巫卜備至迨長學成弗即遇時以好言慰公曰此子必遠到遲早命也既舉丁丑進士高等為時名流即拜兵科給事中今上皇帝覃恩兩宮首建禁近之臣由是公受封俞受贈而孺人遂並命矣既乃喜曰病婦蒙恩何以堪此公曰吾亦思之第當恪守儒素以成吾子庶所以為報稱者一意深藏養恬故給事罔內顧以共其職云逮與

告還每孺人初度給事率弟若子稱觴戲綵以為常一  
鄉榮之年五十有九以嘉靖五年十有二月六日卒給  
事尤極哀慕奉其友給事趙君之狀衰絰走四百里而  
問銘於上海陸深按孺人世家海寧城北隅大父諱縉  
父諱正生而婉順浙之東西稱賢母云子男二長即相  
卿次即桐卿女二適祝繼暄周王府典膳適賈中錫太  
學生孫男四曰聞過給事出也曰聞遠聞運聞近典膳  
出也女八卜以今年丁亥二月十二日己未葬于九杞

山永安湖杜曲之陽以深觀于給事之孝而槩于孺人之賢也宜銘銘曰

夫曰賢婦子曰賢母儷榮應典若券左右風斯引之茲曰不朽萬世在前萬世在後

儼山集卷六十四

欽定四庫全書

儼山集卷六十五

明 陸深 撰

墓誌銘四

朱夫人秦氏墓誌銘

朱夫人秦氏壽七十有一以嘉靖三年冬十一月乙酉卒於旅溪尚書之里第尚書公哭之哀凡朱之内外族人哭之哀秦之人來哭之哀里之人相向而哭之又哀



嗚呼是可以考夫人之終矣卜以又明年丙戌冬十月  
十一日奉窆於錦灣西祖塋之次嗣子警誓以尚書公  
之命來問銘於陸深予家朱秦間猶東西鄰也外氏梅  
於朱尤近習聞夫人之德稔矣其敢辭乃按秦君文解  
狀誌之文解夫人猶子也狀稱秦出高郵之邗溝本宋  
太史少游之族建炎南渡有諱知微者遂來居上海高  
祖以政曾祖必通皆修隱操祖瓊號松軒軒豁有壯氣  
父諱濟號午山樂善舉義屹為秦望夫人其長女也母

李氏有淑行夫人生六年而母背育於祖母張夫人幼有至性松軒翁竒愛之事翁與張夫人迨事繼母朱曲有禮意以孝聞稍長嫺女紅通書史大義故憲副鈍菴朱公擇婦也嚴年十六以歸尚書公事鈍菴公與王夫人必敬必慎鈍菴時時自官中寄詩勉其子夫人即熟記舉其語諷之尚書未達時為歌詩或出無聊語夫人亦時時誦之鈍菴公既謝政歸夫人遂總攝家政鉅細豐約悉有條理雖尚書一錢以上不妄費也至脫簪珥

以佐賓朋無靳容成化甲午尚書舉鄉試卒業南雍夫人與俱躬織紵以助薪水之費甲辰登進士捷報至而夫人適歸寧于秦宗人豔之夫人意沖如也宦轍所至夫人輒隨尚書內掌刑曹外司按察每夜歸必請所訊罪至大辟即愀然曰人命事重君必慎之弘治戊午鈍菴公屬纊時撫箚呼曰兒婦安在若將有所屬者諸婦迭往瞠目視曰欲見秦婦耳夫人奔喪還意甚傷之既尚書服除還朝夫人遂留侍王夫人遣一側室從是時

尚書未有子也夫人侍王夫人備至內外裕如已而尚書奔王夫人之喪還百事具舉有助葬者尚書欲却之與夫人意合一無所受凡尚書有所舉措惠澤及物必力贊之夫人意有所為或尚書所未及也故尚書官成九列無內顧之憂朱氏之門閥益以大白首敬共猶一日也處妯娌有惠御臧獲有禮尚書公晚未獲嗣每擇佳媵以進冀有子焉及舉子愛之不啻已出尤人所難者訓諸子諸姪各底成立有為時文儒彬彬起科第者

雅尚勤儉無華侈之風有餘財即以濟貧乏故卒之日  
無留贏焉奉午山公尤盡孝愛午山卒時夫人年高且  
七十矣奔走於殯葬遂感風眩待其弟姪輩每近於厚  
有憂深思遠之意非世俗所能窺也夫人諱端字惠以  
甲戌年十一月六日生受封至宜人子二長警太學生  
方以器局需用娶沈氏次簪俊敏績學娶陸氏女二長  
適都察院檢校張豈次適中書舍人陸修內外孫男女  
凡十人云唯夫人出自舊族歸于名家天錫之厚既有

異稟而所以為觀刑之地者固有本哉令妻壽母賢婦  
孝女具彛道焉抑足為世教勸也懋矣是宜銘銘曰

玉駢珠儷為世所珍並善兩美肖哉斯人尚書有婦夫  
人有夫鵲巢麟趾詎云絕無以似以續大厥門戶忠臣  
碩輔茲焉維伍茲溪縈流蘋繁載羞霜露之感曰萬春  
秋

軍器局副使宋公墓誌銘

按公宋姓澄諱一清其字也山東武定州之宋其先也

曾祖士榮祖仲輔父福文思院副使母裴氏其世也宣德初仲輔始以尺籍隸武功中衛故世為都人成化癸巳公以修大內功陞文思院副使弘治改元免歸辛酉復以修城功再起為軍器局副使正德丙寅謝歸其官也李氏其配也子男六長鑑丁卯舉人娶葉氏次鉞辛未進士拜行人娶徐氏次鐸冠帶娶田氏次鈺武功中衛總旗娶王氏次鎧娶戴氏次鎧孫三曰廷相曰廷槐曰廷椿其後也女三袁賢馮華范銓其壻也孫女一適

俞志同公少學進士業乃更從司空以世其官器局秀  
整幹畫精密於職必勤也天性孝友慷慨樂施家無妾  
媵之奉而言動淳直無弗愛者其行誼類此其生也以  
景泰乙亥八月三日卒以正德壬申正月廿有三日享  
年五十有八其葬也卜以是年二月廿有一日從先兆  
於小南城之側乃乞銘於太史氏深曩入京聞都門外  
三友堂名籍甚既乃鑑來自余授詩遂登堂識公焉和  
厚愿雅儉勤以文余偉而敬之三友堂者公所葺也外



環花卉中度圖史以友章縫之士又曰因以教子以求  
益者也夫友以德德可以世矣丁卯之秋鑑鉞同領鄉  
薦余再登堂賀焉公從二子欣欣迎余辛未夏余再入  
京而鉞已成進士余再登堂賀焉琴尊無恙而公已病  
不能揖客余私憂之閱歲而訃至余四登堂則遂哭之  
矣不五載而人事果何如也若公其無憾也已余宜銘  
銘曰

有要者途彼踐斯棘古稱不卑我力我職有尼而止亦

起而仕以茲澤餘溉及厥子彼都人士風人所思思公  
不見悵矣其悲順則斯委歸亦曰全過而式者後千萬  
年

西郊先生瞿公墓誌銘

正德壬申十二月某日葬我西郊先生於長溪館甥深  
寔以職事獲誌其藏曰先生諱崙字茂卿故有別業在  
西郊習而稱之曰西郊先生云誥贈後軍都督府經歷  
諱晟之孫義郎蒲泉公諱霖之子也少失母鞠於祖母

誥封太安人凌氏稍長受業於從父今臨安太守南山  
先生有成矣蒲泉公委之家焉先生稍用其學於家家  
遂斬斬晚事繼母孫孺人以孝聞又虔事凌太安人太  
安人時時來就其養弘治辛亥歲饑輸粟若干詔補官  
廼大有貲積晚用雄一鄉先生不為守聚計益務施予  
樂惠建義友輩有落莫者資之使大發然竟不言或梁  
於行或轉於死或衣於寒糜於饑貸於所不能償者百  
金時舉也蒲泉公觀其志已甚悅焉公嚴先生事之無

不得者章服儼然寡言和色君子惜其無推挽之者使  
當世獲其用而僅見之一家焉見之一鄉焉就其孝友  
所至已可準古所謂鄉先生者其人矣年五十有九以  
某年某月某日卒配陳孺人有淑德佐贊之道稱其為  
先生婦也子男三長曰鵬績學攻文歷試南北京闈娶  
吳氏繼曹氏仲曰鶴為進士業有聲娶唐氏俱太學生  
季曰鸞娶韓氏補醫學訓科息女三長殤劉杰潘文其  
壻也孫男七曰學顏學會學思學孟學周學召學伊孫

女五嗚呼惟深前孺人瞿實先生之親姑家公太史之  
憐孺人也不置久而必泣凡遇孺人之兄弟必泣又遇  
孺人之諸姪則又泣伯氏宗海與先生兄弟行也謀所  
以慰太史公者迺以長女壻深及妾禽焉而歿深獲以  
舅禮事先生每歲時候問則先生必泣於堂陳孺人必  
泣於室或留與鵬同學往來出入先生未嘗不送迎焉  
退而與孺人相向未嘗不泣深既得官而還思所以慰  
先生者議以弱女歸先生之孫而先生不可作矣嗚呼

銘曰

匪古迺世匪今斯人承茲傳茲以萃厥身亦有不朽斯  
文永存宅是長溪以需後恩

丁素軒墓誌銘

素軒丁公既卒之明年謀以某月日奉窆於某原其外  
孫冒良予同年友也次其遺行其子倫奉以請銘予讀  
焉而得公之為人也公諱某字良玉號素軒金陵人也  
其先世籍廬州祖貴從起淮甸以功授泗州千夫長父

某南京某衛鎮撫娶馬氏封

闕

人至公之身以輸粟功

加贈鎮撫府君為明威將軍母為太恭人其兄輝進爵如父階公自幼不羣齠年失怙哀毀如成人親母愈謹長即綜理家政日不暇給所為多敦本善俗之行故賢者不以為陋中才者不以為過也孝友之性得於天者獨至薦時拜墓禮容有章昆弟之間形骸可合併也外祖父馬英以錦衣指揮調廣東卒歸柩託公經紀其喪卒為之守墓不替嘗服賈從者發橐覺而不言道遇人

為貸家所苦即傾橐代之蓋長者云性不嗜酒故平生  
不見其苟簡與人交雖不為斬絕而富貴崇高之勢毋  
得而加焉以弘治癸亥之歲八月乙卯壽終于正寢上  
距所生宣德之癸丑春秋七十有二配馬氏子男一即  
倫孫男二曰武曰斌息女三長適明威將軍徐某次適  
舍人李芳又次歸于山東參政冒某為繼室嗚呼善必  
獲報報將在公之後也叙而銘之銘曰

往也惟忠國之所臧惟孝惟弟家焉斯昌嗟嗟丁公厥



存則良遙遙餽邊不有其藏俾食厥報曰莫敢當推于  
上世有燧寵光嗟嗟丁公奉德馭已統在有繼豈曰非  
美惠家睦宗舍和履砥開國之孫明威之子不愧于生  
不朽于死勒辭貞珉永奠厥止

處士朴菴倪公墓誌銘

浙之東處士朴菴倪先生卒訃于京師其仲子翰林院  
庶吉士宗正解官歸治喪且葬奉其友人張君邦奇所  
為狀問銘於松江陸深深按處士諱某字用文一諱彬

餘姚人也曾祖諱某祖諱允中有隱德父諱守禮有詩  
名處士美丰儀善談辯詞吐鴻臆時舉經史與義相詰  
難一座皆傾其所為多俊爽不動以利不屈以勢又能  
以信義服其鄉人鄉人爭訟有不願之官府而願得處  
士一言者歲時伏臘必聚宗人酌以酒告以振宗為善  
之道衆皆悅家理故薄而好客不倦多取給於外氏勇  
於為義嘗覽范文正義田記擊節嘆曰吾志也兒子二  
郎終成之迨晚一歛其邁往之氣歸於爾雅又儒者也

喜歌詩通陰陽術伎有造精者其所不信而深排之則  
浮屠法與巫覡云處士少處人倫之變長而能教其子  
尤為人所稱初守禮公年既長無子其伯兄意以已子  
後公未幾公繼娶陳氏生處士及處士之弟又未幾而  
公卒時處士年纔十餘耳始謀者瞠曰兩遺孽去之則  
產吾產也日來擾其門穴憲毀瓦推瓶倒罌躬穫以歸  
則要諸路擊而奪之死者屢矣時陳母外無以禦強暴  
內無以庇其孤日夜哭泣因以喪明處士百千委曲以

有成立而陳母卒後每見目眚者則為之一慟至其待  
讎者之子弟未嘗不如族人也是可謂怨而不怒者矣  
處士食指既衆家尚不給或勸之曰若子盍使之從賈  
處士聞之歸撫其子曰吾兒賈人耶是當以文學裕吾  
家使之讀書不輟若是者可謂不惑於流俗而善貽謀  
者矣今談者必曰倪處士倪處士云年六十有四以一  
疾而卒時弘治丁卯閏正月某日也配汪氏賢而能相  
子男三長某次即宗正次闕孫男五闕息女二將

以某月日葬某原深與宗正同舉進士又同官茲弗敢  
弗著宗正哭而告予曰吾七年於外求以祿養今得祿  
而吾親不逮已矣深聞而愈悲之乃系之銘曰

遭變孰難難歸於厚有蓄弗施而匯為其後嗟嗟處士  
仁勇曷負剛則不折貧而能守惟不折與守乃見其有  
勒辭貞珉以永不朽

曹母顧孺人墓誌銘

友人曹君弘濟幼喪母鞠於祖母孺人既喪大父連喪

其父獨依孺人以居實兼兩世四親之義及是孺人卒  
弘濟為斬衰服三年弘濟長深十有四年而交數宿食  
孺人舍嘗登堂納拜焉時孺人年已八十毛黃白于  
領癯如而精堅家事一不關白其孫弘濟得專力於學  
慨然以報劉為志弘治甲子春弘濟將有事於科場而  
孺人遂屬續嗚呼悲哉深適還自南雍哭孺人於殯次  
弔弘濟於總幃弘濟毀瘠扶而拜杖而起殆不勝哀既  
而以深粗明已志又識孺人諉誌其藏深辱弘濟忘年

視孺人寔有母道且勤館穀之德敢不是著按狀孺人顧姓諱妙真義望曹公度之側室也其先嘉定人有諱叔臧者孺人之父也始來占籍海邑初公度既壯無嗣父母憂焉聞孺人潛德欸懇求之閱時果產子瑞以繁曹宗孺人幼聰慧精女紅父母甚愛之慕公度之為人而歸之孺人執禮不越事舅姑如事父母事其嫡如事舅姑久之萃愛敬焉凡事事必謀及於孺人孺人務殫心竭誠咸輔厥宜終始一軌其修饋祀必時以旨其治


衣飾必儉以潔其處閨閫必嚴以肅相夫子應宗黨御  
僮僕皆有憲度各滿其願公度遂以富饒禮義甲海邑  
孺人之力居多己酉遭公度之喪壬子喪其子悉采古  
禮而襄之婦道母道盡之矣晚年唯一孫侍養尤篤情  
愛每親師取友必戒之曰近君子遠小人毋爽厥德以  
忝所生癸亥秋嬰疾厯冬徂春而勢愈張猶呼弘濟與  
之款語曰吾且忍死終待汝成迨弘濟試御史臺還忽  
厲聲曰吾不濟矣勉諸後勉諸後言訖而逝時二月某



日也享年八十有六云子男一即瑞娶吳氏息女一曰淑蘭皆先孺人卒孫一即弘濟邑庠生娶談氏曾孫凡五長恢亦邑庠生次懷次憬次愷次懌卜吉於弘治某年某月某日奉窆於范溪祖塋之側禮也惟孺人儉勤淑謹長順和惠粗涉書史能知古今得失至於醫卜書算博古格物之類皆合于學蓋其天性然也其為忠臣碩師於曹諒矣哉宜銘銘曰

穆穆孺人終昌曹氏如劬斯獲允副厥始緝勩纍勩豈

愧良史勤家惠宗嫡仲任只中更家紛載罹夫子居中  
應外有容有禮莫齡撫孫携手提耳將食其報竟不少  
俟短景下馳挽歌莫起徽志必承豈曰生死范溪滔滔  
有芹有芑後千百禩鬱鬱高壘



儼山集卷六十五

欽定四庫全書

集部

儼山集卷六十六至六十八

詳校官庶吉士臣李如筠

中書臣劉源溥覆勘

總校官庶吉士臣何思鈞

校對官助教臣卜惟吉

謄錄舉人臣蔣雲師

欽定四庫全書

儼山集卷六十六

明 陸深 撰

墓誌銘五

將仕佐郎刑部司務黃溪孫公墓誌銘

嗚呼黃溪公遽至於是耶嗚呼黃溪公竟止於是耶自  
余束髮與公交好同筆硯聯衾席以周旋於兩都之間  
因以徧交當世名士自窮經考文求志講學以相與許

可期待於意氣之外者何如也余去國五七年公竟不  
轉一資而卒訃聞哭之盡余哀乃復低徊輟泣誌其墓  
曰大道既隱風流日靡士大夫馳驚於功利之區往往  
處下以窺高而於出處進退之際蕩無紀限尚安知所  
謂義命之歸者耶余大為是懼公才宜舉進士每向余  
曰從鄉舉非出身耶既試天官名在第一得京官在第  
九品則又曰苟事事非從仕耶余心是之嗚呼公今已  
矣且恐朴厚之風從之以盡余又安得不悲嗚呼公諱

鶚字朝立姓孫氏故上海世家居龍浦之南因以姓其地曰孫家灣云祖諱怡號節軒祖妣張氏考諱寅號愛溪妣張氏公生六七歲讀書屬文已不羣節軒府君愛之嘗指謂所親曰吾家世儒達者在此子節軒以文學雄鄉郡有成集行世仕止賓州學正愛溪府君恒服賈遠遊以為養而又以資公之學公弱冠出試有司輒優等嘗師事今中丞東泉姚公公尤奇之弘治戊午領鄉薦中遭愛溪府君張孺人之喪哀毀盡禮居閒教子姪

彬彬起科目正德庚辰始就選授將仕佐郎尚書刑部  
司務公在刑部盡心職事時命獄吏清圉舍捐俸佐囚  
食時其寒暑而矜恤之全活者甚衆諸司事有弗平者  
輒平之僚友之際不為苟同而卒歸於理大為諸司冠  
所器若見素林公而下無弗任之年五十七嘉靖丙戌  
冬以早寒趨朝急遂得疾以二月廿六日卒於京師之  
旅舍配王孺人有賢行先一歲亦卒京師之旅舍至以  
雙柩南還遂合葬薔薇涇祖塋之次寔丁亥之十二月



壬申日云子男三長繼臣國子生娶沈方伯西津公女  
次繼科縣學生娶劉氏次繼謙縣學生予表弟顧喬芳  
壻也三子俱有文行將大發公之藏者女一在室與其  
同年友嘉定沈僉憲東溟公長子聯嫻云嗚呼系之銘  
曰  
絀於前將裕於其後年則不永而銘為之壽同室同穴  
抑又何負視此銘詩以信我友

孫孺人胡氏墓誌銘

國子諸生孫世隆以予友張進士于漸之狀來為其母氏乞葬銘予遂往弔焉還而誌之曰孺人姓胡氏孫君朝用之配年五十以嘉靖五年丙戌六月廿有一日卒先是朝用輸里賦京師留滯越歲不及視殯殮事既歸而視窆寔事甚哀且哀其賢也卜以丁亥某月某日從葬茲溪祖塋之次遵父命也按狀胡氏世居上海之烏泥涇有諱鼎號耕隱寔生孺人孺人生八歲而孤奉母吳事諸兄曲盡孝弟一溪孫翁聞之遂聘為朝用婦既

歸事翁姑尤極孝謹待賓客奉祭祀豐潔中度世隆既知學補郡諸生資給之不乏至北遊國學間謂朝用曰孫氏饒裕如胤嗣單弱何君胡不自為計朝用不可徐謂之曰君視吾姑婦耶乃擇得夏氏舉一子愛之與已子等兄文泰多女為養其季者厚貲以贅之其他鄰族匱急罔不推濟故其卒也人尤哀之子二長即世隆次世濟女一適張伯澄即于漸子也宜銘銘曰

百歲詎有五十亦壽夫稱賢婦子稱賢母奉之白首爾

姑爾舅承前啓後茲石不朽

散官北園唐公墓誌銘

嘉靖乙酉閏十二月六日庚申北園先生唐公之葬合以孺人宋氏兆在金匯塘之東從祖塋也公壽七十有六孺人之壽同卒之歲又同又同以是日葬蓋合德也人尤賢之其子若孫益哀慟不任相率來問銘圖永終也深按沈君愷之狀公先汴人也宋有將仕郎貴一扈高宗而南至于松卜居于華亭金匯塘之上厯元入國

朝日以大曾祖諱璟字廷譚號東臯祖諱玉字伯堅號耕雲皆有隱德父諱壩字景臯號勁節母周氏有內行公其長子也後勁節府君以次子禎貴贈兵部車駕司主事母周贈安人公諱祚字原德北園其別號也自少嶷異異羣兒數歲知嗜學長以家產出督里賦遂至中落猶閉戶讀書或勸之仕不應勁節府君謂之曰汝宜總家政相汝弟成名吾兩子後唐各有立是吾志也公曰諾遂一意幹蠱色養事二親凡所欲咸盡心力母病

久卧公夜未嘗帖席比其卒不渝喪居哀毀如禮與弟  
西園友愛尤篤西園者即兵部君也字原善舉成化丁  
未進士後官至禮部郎中聲績隆重公之贊助為多壬  
寅應詔輸粟關中凡若干斛例授郎官冠服偉如也正  
德戊辰饑公為作糜粥飯若干人死者為具棺又若干  
人務樹德也今上登極尋被粟帛之賜鄉飲酒禮郡請  
當賓位一時鄉邦之人推齒以德者未之先也配宋孺  
人出望族松人稱蕭塘宋云父諱言號存耕母潘氏孺

人生有令質長有令德存耕翁為擇賢配得北園歸北  
園公曲盡婦道孝惠敬肅唐之族人稱焉燕賓治具不  
問皆中家塾教子弟晨夕饗饋皆其手出公嘗欲給錢  
以勵勤者請於公曰利於子弟非所訓也宜以紙筆充  
公深是之晚歲猶親女紅家人就寢中堂燈燭熒然刀  
尺有聲衣飾雖敝不忍厭棄公嘗指所居示子孫曰得  
承先人弊廬以至今日者宋氏之力也先公以八月九  
日卒公後以十月一日卒子三長僎國子生先二年卒

次傅王府典膳次僊縣學生女二長適國子生談壽次  
適金山衛學生李煦孫男十長自誠次自明應例入監  
自新府學生自謙早卒自道命後仲子傳自得自古自  
立自守自持孫女七長適馮鳴殷次適王謏餘未行曾  
孫男五以嗣以禮以文以德可大會孫女四惟公承家  
世之舊天賦精敏言動綽有禮度躬行孝友之道惟敬  
惟勤以終其身故家日饒裕以副其好禮舉義之志詩  
書之風彬彬然科第踵接起矣蔚為松之望族可謂光



前而啓後者哉嘗聞公戒諸子孫云凡事以豫為先小事隔日思之大事隔年思之時以為確論云深初舉進士讀書中秘時與西園公締通家之好茲以兒子揖議婚於西園之孫與公之從子儒寔有婣誼今年夏與表弟顧君定芳拜公於里第談燕浹日巍然名德君子也神觀修整有松柏歲寒之操詎意遽哭公孺人於一旦哉為之銘曰

金匯之塘流湯湯東海沃蓄南浦傍氣聯派續者蕭塘

約束靈秀調陰陽中有異產德乃雙何殊梁鸞匹孟光  
門戶宗祧興美唐潮汐草樹俱輝光尚有遺祉封若堂  
金純玉采深以藏生世猶短沒世長請示茲文徵不亡  
千代萬代其永昌

鄉貢進士錢公墓誌銘

鄉貢進士錢槐亭先生卒於華亭之里居寔以嘉靖己  
丑六月五日即生亦以己丑六月五日得年六十有一  
卜以明年四月二日戊子葬於徐家濱東祖塋之次其

子子才授狀於深以乞銘深與槐亭同舉於鄉乃今且三十年矣不容辭按狀公諱恩字承之別號槐亭姓錢氏錢出吳越武肅王至公蓋十六世云元直學公出自洛徙松遂家華亭望仙橋之東高祖壽祖號屢隱曾祖行號竹屋散人祖敬號瞻筠考璋號友桂皆修隱德公幼穎異就外傳時與趙少卿經同業書有名初友桂翁與趙悅梅好一日各攜其子游別墅令默誦四書公誦如流觀者驚歎弱冠值翁以鄉賦累其家日落公勉力

幹蠱出耕歸讀與僮僕同甘苦者幾十年遊邑庠與朱御史昂周御史鵠沈教授暄輩爭相濯磨凡試必先一時聲稱大譟從遊者日衆弘治辛酉遂領應天鄉薦高等明年上春官屬翁微疾強之行既南歸極意為養親計郡邑交聘為弟子師悉不應舊所受者亦罷遣之翁嘗受誣郡守宜春劉侯幾不可辯翁籲天曰吾誠有此事吾安得有吾子守問子為誰曰錢恩者即憮然曰恩美器也汝能善其子而顧不能善其身耶遂釋之歲甲

子翁卒公喪葬如禮悉力營墓道人以為難一時門生  
故友往往取贖仕以去公雖春官不售自如也益為敦  
本崇孝之行修家乘建家祠設家塾置贍族之田整葺  
上世諸墓有惟日不足之意丙子喪葉孺人如禮服闋  
應謁選銓曹公意不屑也乙酉秋以舊患手足顛掉度  
不能愈即預為後事營雙壙以俟己丑春命子才行親  
迎禮已乃考終配趙氏賢勞克相側室尤氏包氏子男  
一即子才包出娶陶祠部女女二長適侯伺次適監生

徐應奎皆趙出公平居性極儉勤敝冠垢服每不為恥而灑掃纖瑣之役亦躬為之與人尤和易坦率不為高岸矜炫之行稠人廣座中欣欣然不廢諧謔田父氓叟有邀必赴雖蔬食滴酒為之盡歡處宗黨尤極篤厚與弟惠白首相愛方病劇時出數金授惠曰我後事具矣汝亦為之令及我目不諱可也侯氏女早寡以承繼為後侯祚益衰俱無所歸先生為之收育于家復教承繼有立為之娶于葉復為之割田以贍人尤以為難云深

與公雅相知厚蓋孝弟敦朴人也若夫諳練之才使盡  
用于世雖古名卿輔亦何以讓乃止于是惜哉宜銘銘  
曰

緊昔侯王必復其始公歛厥施將以遺嗣子蔚蔚槐亭  
綠陰滿地精魄閔茲尚有徵於不死

喬母陸孺人墓誌銘

嘉靖十有二年春正月某日葬喬孺人陸氏於榆木涇  
之北原以合於怡閒公之藏禮也怡閒公姓喬氏諱嶽

字鍾秀別號怡閒邑故大家公尤個儻日蕃且大以弘治壬戌之歲幾五十而卒明年成葬孺人躬親視塚壙處墓所月餘後之三十年乃克從焉志也其子通判安陸州事積問銘於陸深按孺人陸氏又故大家族於東海之上父諱紳孺人生九齡而母某氏卒乃育於外氏凌姪任即能以幼弟妹各一人同有立既筭歸怡閒公俱以門第相高而男女比德為宗黨所稱逮事南園府君余孺人余又故大家也咸色喜曰吾此兒有此婦家



其有濟耶南圃府君嚴每有疾即不喜他人奉藥孺人時親執藥進即喜為一啜南圃府君余孺人後先棄養孺人治喪祭井井如禮乃總家政以相怡閒上下親疏曲有恩義延師教子輸粟助邊怡閒公多所賴焉初有慫恿訟事於怡閒公者公曰噐且健矣獨不念後人耶孺人撫安陸君於旁曰政為之地爾有奴逃且負或謀抵死怡閒公曰計良耶孺人亟搖手怡閒乃置勿問邑故大家以德誼聞者曰喬氏喬氏陸孺人有力焉孺人

生以景泰癸酉三月三日卒以嘉靖己丑十二月十二日享年七十有七故卒之日上下親疎多為之涕淚云子一人即稽孝謹和厚以世其家娶馮氏繼邵氏孫男四謨訓國子生誥縣學生說孫女一曾孫男二曾孫女三子與喬世嫻於孺人則為同姓與安陸君同學同場屋者屢矣蓋通家云序而銘之紀實也銘曰

婉美永世有相者存譬彼喬木陰遠益繁嗟嗟怡閒詒厥子孫孺人相之以大其門其大維何家範國恩鬱鬱

高原豈曰後昆過而式者日遠日敦陵谷萬年以視斯  
文

俞孺人墓誌銘

南京詹事府主簿唐君士儀以公便還葬其配孺人於  
肇溪之塋者禮也時以歲辛未正月癸酉者吉也迺來  
問銘於深按狀孺人姓俞氏諱永寧南昌丞俞公諱麟  
女也天畀淑慎勤精女紅南昌公竒焉曰必以得佳壻  
及笄歸詹簿君事都憲公尹夫人公夫人愛焉曰必當

佳婦公之去為牧伯守鎮也孺人每以不親養為歉歲必製時物函獻公夫人在數千里外嘗之必曰是吾冢婦所為也是故終公夫人之世獨孺人適稱順志焉詹簿君績文種學雅量嗜義率於孺人焉是相賓從滿座干請者皆至又孺人中贊之人之知譽之者詹簿君也教諸子孫尤得其理富者進以義敏者勗之學幹者率之以儉勤也其賢若此大抵稱其為唐氏宗婦也年六十有五以正德己巳十一月十五日卒子三長隆義授

千戶娶姚氏早卒次啓縣學生娶梅氏次政娶沈氏孫  
三紹宗繼宗承宗孫女二皆適仕族曾孫四官保秋魁  
期元應魁深竊觀女德最隱其功最巨蓋不獨家之盛  
衰由之也往往賢女多出於故家名族將其觀化者然  
耶惟吾邑之俞最舊而以清白禮教傳者最遠誕毓孺  
人言歸于唐唐又最顯族也式克承之身所於處為子  
為婦為母考於詹簿君於諸子孫靡有遺悔焉懿哉孺  
人之德所由來者焉可誣哉宜銘銘曰

美珠良璧所託者然名山深淵珠光璧器用斯允臧彼  
被者昌小星易歌河清難俟珠糜璧毀韜珠瘞璧崇岡  
斯厚以延厥胄

儼山集卷六十六

欽定四庫全書

儼山集卷六十七

明 陸深 撰

墓誌銘六

太學生竹溪唐君墓誌銘

嗚呼此竹溪先生唐君之墓蓋從其先塋金匯之阡以  
嘉靖癸巳十二月十有七日乙酉間予銘藏焉予始舉  
進士讀中秘書僦居西長安里與禮部郎中西園唐公

實連屋是時吾松之宦于朝者故禮部尚書南山張公  
為光祿寺卿直文華殿禮部尚書東江顧公方侍讀翰  
林大理少卿中岡董公在刑部今肇慶守宜菴董公在  
禮部故中書舍人沈公繼昌侍內閣鄉好甚洽無暇日  
無相過從公長者也而會尤密予既近居復與公之從  
叔宗禹同鄉舉故相好益歡公既病予候問益數數焉  
公竟不起予哭之益哀且填其行狀而竹溪方自家來  
奔以兩旬日行三四千里人愈憐之而予始識竹溪年



少又長者也予屢產子皆不育年且四十始得楫子早  
夜心計之安得積善好修如唐禮部家者婚焉以延予  
世會聞竹溪有女往請焉而諧乃大愜予既忤時再有  
晉陽之役時竹溪構疾矣還遽哭之尚冀或臨其葬及  
是葬有日矣予復為豫章之役遂不得往相其紼嗚呼  
吾尚忍銘吾竹溪哉竹溪姓唐氏諱儒字子魯尚書禮  
部郎中唐公諱禎字原善號西園之長子也母劉氏贈  
安人世居華亭之白沙里其先汴人系載少師大學士

東湖費公西園墓誌中西園多竹有水環焉竹溪因號以識先澤自少穎敏動以禮閑服飾器御敦尚朴雅年十四母劉安人卒毀瘠幾殆嗣喪陳安人如劉安人再喪王孺人如陳安人西園公舉成化丁未進士家食久被命入朝竹溪奉世父北園公總家事以居北園公特鍾愛焉讀書郡城中攻苦淡學以大就每從郡邑諸生試諸提學御史每優遇之每舉於鄉輒不售正德戊辰應列入國監時弋陽汪雙溪先生為祭酒復優遇之自

國監再舉再不售迺卷懷以歸以家為政斬斬有法孝  
弟之風洽於鄉閭先是西園卒二弟侃价幼竹溪撫之  
各有立遂將建室植產以居之布散聯絡有恩有禮一  
時端人正士咸重之樂與之交有勸之仕者則曰吾家  
世受國恩吾敢忘吾忠蓋顧出處自有命也乃即竹溪  
之上修西園堂刻遺稿以度之又築勁節之亭以見志  
益樹竹數畝濬流其下時復徜徉若與漁樵為侶客至  
則飲奕款晤備有煙霞水石之勝故吾郡東稱舊家必

以唐為第一而唐之象賢亦必以竹溪為第一云家居  
自奉甚約力田教子外絕無他慕四時享祀必敬必躬  
嘗有六世祖塋就廢既卧疾耳語价曰成吾志者吾弟  
也手數金使修復之乃完以嘉靖壬辰二月十有八日  
卒於正寢享年五十有二云惟竹溪君天常甚厚無嚴  
聲厲色嬉笑話言藹藹有旨趣飲酒至百盃而能不亂  
倉卒應大事靜以鎮之觸物有可傷無間古今疎戚即  
淚潸潸然下殆仁者與初弟侃早卒無嗣即以子自重

後之繼而自治生乃以自治易自重人以為合禮而自重復歿竹溪委曲其間能使朱氏婦有所恃以完其節人以為達權宋氏甥早失母竹溪撫之如女既長以歸張進士鳴謙人尤以為難云配張氏賢而克相即南山公之從孫子男一即自治聘沈進士服采之女進士中舍之子而學士之世嫡也女四長適董希大於少卿太守為從祖次適顧應雲即東江公之孫也又次適陸楫又次許聘何應鰲按法宜銘銘曰

仁不必壽亦既有後厥所施張百不一偶有質有文且  
創且守豈間家邦曰唯孝友東海所匯長江抱右生直  
死哀自足不朽天道無私發豐蓄厚嗟嗟竹溪抑又何  
負

唐處士夫婦合葬墓誌銘

徽有處士先生行誼在宣德正統之際曰唐邦仁諱禮  
年四十卒在天順之壬午越五十年正德己巳之歲其  
配仇孺人年八十有六卒其子封文林郎知縣傑卜以

某年啓而大封以究孺人同穴之志禮也其孫澤方事  
今上為刑部郎中迺於京師乞銘於深深讀本朝御製  
至五倫書顧見高廟駐新安時召耆儒與論理道有唐  
仲實先生者以不嗜殺人對上悅賜尊酒束帛心竊慕  
之至是受郎中君狀先生實處士曾祖也按唐本氏李  
有諱虞號梅癭者後於唐遂姓唐本德宗之後或曰國  
姓也世居汴宋南渡時諱承昉者守新安因家焉故今  
婺源之嚴田有池曰飛龍橋曰太子云高祖諱元為關

洛考亭之學虞文靖公集以前輩風範稱之仕終徽州路教授曾祖即仲實公仕終紫陽書院山長祖諱子儀舉賢良知興國縣文廟選為趙府紀善父諱永吉以註誤謫戍卒於邊時處士年七歲張孺人母之少明敏能讀書旁及星歷之學性孝友痛父之冤也故竭力養其母如父事三兄禮如事其父後當析居地有右者術云不吉處士曰吾也少當居是雖諸兄亦莫之能強也邑嘗置監長平倉出納維允鄰有汪姓者匿其產於他戶



以欺之於異母之弟處士發其籍曰骨肉至是耶且使  
百世爭也釐正如故友人有喪明當赴之薄暮雪深別  
卜葬期來告處士已三鼓冒雪往矣居嘗曰吾唐世文  
獻新安之稱必曰三唐先生至吾而遂微乎乃以為任  
數年而姪行相繼取科第為監司郡守者三人處士有  
力焉仇孺人諱誠歛舊族也處士卒時諸孤孺長才  
八歲季猶在姪而貧窘甚父母憐之欲其就食於家卒  
不往冬寒絺幘雪時綴裙布為被以體溫諸孤而環之

處士厝所僅百武而東雨時輒往庇淚與雨俱注張孺  
人在堂方有幼子之戚損食復還泣事之聞者悲其志  
云邊戍歲有征索甚嚴或勸鬻產自念曰吾所以不死  
者守此以俟諸孤耳諸方營辦業竟無損李子祿客死  
汴仲子瓚復死荆襄二婦皆守節如孺人云嗚呼唐處  
士之風槩使天假之年或得用於世其所樹立何如也  
可謂刑于寡妻至于兄弟者矣惜也蚤卒而孺人乃後  
五十年以扶植唐宗蔚為詩禮以成處士之志譬諸邦

國可謂得忠臣者矣子男三長即傑娶洪氏封孺人次  
璣娶張氏次祿娶王氏女二長適鮑璋次適方烈孫男  
四溥澤已未進士任刑部郎中漢濂辛未進士任南京  
太常寺博士孫女二曾孫男六銘曰

同室則短同穴則長惟丈夫之烈惟婦之良沈此雙璧  
某山之陽綿綿奕奕以長發祥

誥封宜人陳母黃氏墓誌銘

陳母宜人姓黃氏世居餘姚通德鄉之竹橋里父諱海

字伯川仕至福建建寧府教授方正行古道世稱朴菴先生母某氏宜人故中憲大夫湖廣襄陽府知府虛齋陳公之配也初虛齋筮仕河南彰德同知滿三載赴吏部書上考封及兩世由是父慎菴先生諱某得誥封官如其子列秩為大夫母某氏為宜人而黃宜人從夫貴顯年六十有七正德乙亥考終於正寢既葬仲子熺奉太史李君本之狀來請銘深往歲以翰林編修奉使過浙江謁謝文正公于里第從其子今少宰學士汝湖先

生昆季間得聞虛齋之風既教國子熈肄六館每試諸  
生熈必居首同年倪小野在禮部為予道熈之早服母  
訓也復知黃宜人之賢熈遂以禮經舉應天鄉薦予閒  
居海上熈輒來問學熈母之銘予曷敢辭按狀宜人生  
而貞靜自幼孝敬動止皆有法讀孝經列女傳即通解  
女紅中饋之事咸精工朴菴夫婦鍾愛之朴菴與文選  
陳靜菴先生交甚契靜菴者慎菴先生弟也靜菴先生  
復鍾愛虛齋一日請於朴菴曰吾猶子佳先生能以子

妻之乎朴菴曰諾靜菴以告慎菴乃命虛齋堦焉時朴菴任江西樂平教諭明三禮為一時經師虛齋偕宜人往事之因受業焉宜人內贊力且勤虛齋學成慎菴喜每見靜菴必謝之曰得此佳婦吾弟之力也吾門其興乎虛齋別籍於寧國之宣城以成化丁酉舉應天鄉試捷至餘姚宜人曰差以慰吾舅姑望耳丈夫事寧止此耶虛齋五赴南宮宜人復勸之曰此行勉之二親年高得逮祿養進士第亦等耳況功業又不係此虛齋心是

之已而果就銓試高等得同知彰德府宜人從之官為  
內治政門鑰肅然虛齋之政大有聲九載遷貴州思南  
府知府宜人在任歲時必手製衣履以為舅姑壽既乃  
聞宜人之訃從虛齋奔歸治喪如禮虛齋起復知湖廣  
襄陽府宜人始留奉慎菴於家益孝且敬事宜人尤極  
委曲宜人兩目苦翳步履恒艱宜人出入必扶持之病  
或增手調湯藥至忘寢食處妯娌間情意尤洽舅姑所  
遺多讓諸叔伯同居三十年無間言歲時祭祀從虛齋

行禮潔修感慕無替虛齋好交游賓賢宴集恒簪珥  
以佐飲饌之費性惡僧尼有募修梁道者必以錢米施  
之不吝有來售產者憊患虛齋厚償曰吾子孫且享之  
此亦陰隲也僮僕輩事貿易戒勿取贏曰爾毋招怨也  
日攻紡績事或勸之自便則曰處貴顯以事逸樂使子  
孫效之敗不可救吾用以為戒也性不喜華侈至育子  
女必節其服食曰吾欲為汝等積福耳教子睦族賙窮  
恤匱義方尤多平生鄙婦人失節事若婦人即病或就



醫診視亦羞之故雖得奇疾亦不好藥石偶患足瘍七日而卒寔三月某日也子男三長燿娶某氏興府引禮舍人贈四川鹽課副提舉次即燿娶某氏沂普慶三為知州俱有聲方向用未艾燿益府典膳女一適倪贄即小野太守之子二皆庶生孫男七曰璋即提舉曰文魁潼川州判官次曰垚曰莊曰邶曰垕曰完孫女五曾孫四葬以某年月日卜吉於姥嶺山之陽惟宜人出自名族歸于宦家培養之基素厚而師資之地固殊故善

譽叢焉以予所聞焉槩之良是法當銘銘曰

有苑者園其核實繁室家之詠采蘋采繁禮始夫子棼  
以從類子以母賢妻以夫貴懿哉宜人展也不朽夫有  
賢婦子有賢母土深水厚鬱鬱芊芊視我銘詩後千萬  
年

范時修墓誌銘

范光湖之上厥縣寶應有君子焉余不及識其人交其  
弟不及見其生聞其死順以事親稱其子也文以起家

成其兄也澤以惠宗廣其仁也是三者皆適於壽之道也而竟強年以死嗚呼悲哉君姓范氏諱新字時修大父禮隱德弗耀父畚宣義郎母刁氏兄弟四人君最長其季韶字時美者余之同年友也癸亥歲與俱遊南雍挹其文學固疑有所從來也是冬訃至時美號哭旬日不能仰視客余往弔焉竊怪其過於為禮也迺知時美能詞章取巍科其師師之其友友之纖悉皆時修之力也嗚呼兄弟之間人所難處也友于屬恩訓成屬禮禮

勝使人鮮歡恩勝將枉其才而廢之也君成弟之才而致弟之感以恩以禮可謂兩得之矣由是觀之則其平生可槩識也君性急而心坦能談論好以氣勝人識古今器物頗留意法書名畫又工排律詩尤能幹家植業佐其父致富然未嘗畜一錢私產也宗黨有貧乏者即量給之或不及白其父父終不以為專也及死之日啓篋筭惟存田糧驛站馬草數目父愈憐之嘗自歎曰不知醫非子也由是博覽醫書又曰惟名與器可以榮人

重王命也會朝廷有納粟例即入貲拜其父為郎官雖  
非父志以其孝而安之教他弟各業其業恩禮視韶其  
為多類此初娶同郡張二守之女早卒繼娶張二尹之  
女生一子曰嘉謨一女曰二姐俱幼疾已革父母問之  
無所言強而後曰吾三弟奉吾親吾二息依吾親吾無  
恨也獨眼中不見吾韶此為介介耳以某年月日卒年  
至四十有一卜吉於某年月日祔於官莊祖塋之側余  
不容辭時美之請遂按狀而銘之

有愧而生孰與夫死之寧無愧而殀曷害其表表嗚呼  
時修魄秘靈遊

處士鄭可齋墓誌銘

鄭生舜功再至京師凡三閱寒暑往返萬餘里乞為大  
父可齋銘其墓可齋予故人姓鄭氏名廉字宜簡可齋  
其別號也為人磊落好義舉名卿大夫多愛之尤重然  
諾雖千里之赴不失時日予之謫延平也可齋相予行  
尤勤故予尤德之以嘉靖十八年正月十三日卒于家

得年六十有六云按歛之鄭族最盛最舊有師山先生者諱玉以死節著名諱得韶者以行誼聞一鄉故歛有善述堂可齋之高祖也曾祖孟寧祖文修父成大號鹿門遺隱母汪氏可齋生有美質清修博雅操觚為文翰不下儒者諸技能精巧要妙凡出其手者雖名家或未及壯齡服賈遊吳淞不屑屑於刀錐之末而意氣豁如也歛俗健訟以必勝人為能正德間為鄉人嫁禍郡太守遂當以大罪而可齋寔他出無與亟走京師聞其事

於朝乃械繫赴御史臺種種白其事盡釋自姑熟馳三  
旦夜抵家跪父母前曰兒無狀幾驚二親兒罪獲昭雪  
矣人尤以是服其勇且能孝云配許氏有賢行子男一  
思宏娶某氏先二年卒孫二舜功舜勛茲卜以某年月  
日葬某山之原惟我皇明治安日久而津潤滲漉沃被  
土膏故大江以南號稱殷富欽據上游山谷深固尤多  
故家大族子弟之賢者習為容雅輕財貨好施與然咸  
負氣英英然其過也往往陷於剛折可齋能巽順以自



全不辱其親者矣可謂故家大族之子弟尤賢者非耶  
予竟悲焉為之銘銘曰

千章喬木扶疎枝柯冰霜澗壑摧挫奈何貞士宜簡保  
護寔多慶延於世其廕則那銘以永閱石也不磨

李先生墓誌銘

先生姓李氏諱文字尚文處之縉雲人也李氏之先出  
溫之獨山自獨山而徙台之僊居曰李村又自李村而  
遷縉雲則生一府君也府君於先生為六世祖元末時

為美化書院山長云祖諱襲字秉憲贈刑部右侍郎考諱檜字宗堅妣湯氏方氏實生先生少有美質補邑弟子員績學攻文綽有聲稱胡公某提學浙省以理學為已任每試必加獎譽然每不利於場屋例當貢禮部遭宗堅府君喪又遭湯夫人喪而生母方夫人又喪積哀成羸適同宗人又以事挾制先生使卒不得志乃歎曰吾命也夫當吾病與家釁會也遂理菊莊別居以自娛日以教子孫為事而凡已成之學遂不及一見之行鳴

呼惜哉大江之南俗多貴其所生而以側出者為左雖  
年之長在亦畧焉必克自振立加人數等僅僅與嫡出  
者比然亦背毀而心輕之甚弊習也初宗堅府君遘疾  
彌年先生侍左右最謹府君曰汝孝敬如此吾死之後  
必歆汝饗汝汝宜承吾祀事且以長宜亢吾宗也先生  
泣受之後雖屢遭流言之變惟事包荒而兄弟之間恩  
義日篤人以為難弘治間鄉人疫傳染甚酷雖至親莫  
相援恤者乃為市藥囊米哺之瘳之全活頗衆正德戊

辰歲饑又為出米穀賑之凡活數人有願出身傭作以報德者為謝而遣之里人有負財者顧以他事見誣當道得其情論如律先生憐其貧乃日給之食徐白公庭而出之其行誼多類此以某年月日卒於正寢享年闕

配羊孺人出四川望族婦道克修為族人法以某

年月日卒享年

闕

卜以某年月日合葬於黃坑之

陽子男四曰需曰頤曰蒙咸克厥家曰升舉弘治辛酉鄉試息女一適虞邦瑛孫男十四擢試昂直忠洪臣相

光選亨時元久孫女三深昔遊南雍得與李君升交愛  
其文雅好學今十有五年矣深比起告至都而升亦至  
試南宮乃以狀來乞銘誼不敢辭夫古之君子多負俗  
累孔孟所以致意於里仁之美也教化之不明也久矣  
若先生者明爽洞中樂善慕義豈所謂克自振立者非  
耶其必有後矣宜銘銘曰

其成之難其尼之易胡為而致以承其前以啓其後孰  
匪所有不愆爾相不琢而光君子攸藏太史勒辭以告

來者式車立馬

儼山集卷六十七